

Zunḡwire á wakita na a puwetaa PIYER

Ga use á Piyer

¹ Wakita na yá aṅkwa á puwaná ba iya Piyer, ya slebela á Yaisu *Almasiihu. Yá puwakurte ge kure emnde na a dzerakursaa Dadaamiya ge kwa emnde-aarire na. Yá puwakurte ge kure na kyarakuraakya am larde á kure, kwa wayve-aha kina am Pauntus, am Galatiya, am Kapadaukiya, am Aziya ira Bitiniya.

² Amá a wayete vateneka Eddemiya Dadaamiya geni á gakturvege emnde-aara an hakuma á Shedekwe Cudedede, kwá fansarfe ge Yaisu Almasiihu, kwá gevge emnde cudedede an uzhe-aara.

A magakuránmaga Dadaamiya ṅgurna ba kwakya, a vakurteva hairire keni ba estuwa.

Tama na á zleka na

³ Galaumigálá Dadaamiya Eddenjara ge Yaakadada á miya Yaisu *Almasiihu! Adaba kwakya zezarzure-aara áte miya, a tsantaa ṅane Yaisu am faya. An una ṅanna wá, a vamitaa shifa aṅwaslire antara tama na á zleka na ge miya.

⁴ Zlaḡe ádaliye Dadaamiya a famiyaa duksa shagera na á ṅeka liya, á badzeka, á guleka dekideki na am samaya.

⁵ Daaci kure emnde na fakurtarfe na wá, ankwá á tsufakurtsufa Dadaamiya an hákuma-aara. Vaci zla á duniya wá, á de lyakurselye náza ba ðekideki, tá de nanna emnde baðemme.

⁶ Aðaba tama á kure áte duksa-aha ñanna wá, naba higauhiga, ma kwá ankwá á shá zlaða á duksa gergere keni, ba ge sarte cekwaangudi.

⁷ Zlaða na kwá sháná kure kina na wá, baðemme á una ba ge kura fetarfire á kure, máki fakurtarfe á ba an jirire. Dindar wá, á njeka dem ba ge ðekideki. Amá tá ezzhárá emnde am kára, máki ba dindar miyenne. Sakwa fetarfire emtu? Diyaweddiye geni an dárádza ba fetarfire á kure arge dindar. Zlaða á kure kina na wá, ba ge kura fetarfire á kure ñanna. Am iga a una ñanna maa, watse kwá shá gálá áza Dadaamiya, antara yaikkire ira dárádza, vacite na má watse sasse Yaisu Almasiihu á sawa am ice á emnde baðemme.

⁸ Ndza nakuranka an ice á kure, kina keni baaka ura á nanna, aley wayakurwáyá, fakurtarfe áte ñane. Aðaba una ñanna emtake ervaunðe á kure, kwakya higa á kure, yá taa palanaaka baðemme.

⁹ Kwakya higa á kure, aðaba diyakurdiya názena kwá de shaná kure aðaba fakurtarfe na. Duksa ñanna wá, kwá de lyelye shifa á kure.

¹⁰ Ate elva a lya shifa ñanna wá, nabi-aha ta ettataya diyeddiye-aara an enjkale-aatare baðemme, ganakini Dadaamiya á de lyaná es-tara emnde. Daaci ta fantau ge balateraa ngurna ñanna kwa shanaa kure na ge emnde.

¹¹ Emtsaadé wá, a balatersaa Sheðekwe á Almasiihu na ankwá am itare na, zlaða na

watse á de shaná Almasiihu ḡanna, antara yaikkire na watse á de shaná am iga a zlaḡa ḡanna. Daaci ta ettataya diyeddiye-aara an eḡkale-aatare baḡemme, ganakini watse á de magava am zamane-ara, á de magava estara.

¹² Dadaamiya a naba maraterse ganakini duksa ḡanna wá, watse á magava am zamane-aatare ka, amá am zamane á kure. Ta ḡalakurse ba ḡane emnde a ḡala labare á higa, elva á Almasiihu. Ta ḡalakurse waazu ḡanna an hákuma á Sheḡekwe Cuḡeḡḡe na a ḡelanaa Dadaamiya á sawa am samaya na. Ba malika-aha keni tá kátá ba dise huḡe-aara baḡemme.

Gawevge emnde cuḡeḡḡe

¹³ Aḡaba una ḡanna maa, ma vaatara keni ḡjawinja á ba am niya á kure ge ḡaba Dadaamiya, pauka hare ḡekid̄eki, faufa tama á kure áte ḡgurna na ni á de magakurná Dadaamiya vaci eḡtsa á Yaisu *Almasiihu.

¹⁴ Daaci kina wá, fawansarfe ge Dadaamiya, yawanya mazla-aara mága názena á kataná ire á kure na. Aḡaba kina wá, diyakurdiya jirire.

¹⁵ Gawevge emnde cuḡeḡḡe am názena kwá maganá kure baḡemme, ba seke Dadaamiya na a ḡaakurtaa ḡane, ḡane cuḡeḡḡe na.

¹⁶ Aḡaba a ba wakita á Dadaamiya: «Gawevge emnde cuḡeḡḡe, aḡaba iya ya cuḡeḡḡe.»

¹⁷ Am maduwa á kure kwá aḡkwa ḡaha Dadaamiya an Dada. Watse á kyaná ba ḡane shairiya á emnde baḡemme, ma ware keni áte názena a maganaa edda-aara, ḡane á zhareka ice á ura ḡekid̄eki. Máki diyakurdiya estuwa

wá, kuvaukuva ba Dadaamiya palle am zlaláva á kure bademme, am sarte á kure na jauje cekwaangudi ge njá am duniya na.

¹⁸ Diyakurdiya geni a se varakursaa ba Yaisu Almasiihu am zlaláva á eggye-aha a kure werre na baaka nampire-aara dekideki na. A varakurse an shungu ka, an dindar ka, adaba duksa-aha nanna tá njeka dem ba ge dekideki.

¹⁹ Amá a varakurse an uzhe á ire-aara jauje ge duksa bademme. Yaisu Almasiihu wá, nane gevge ba seke egdza zhel kyawe á sadake á Dadaamiya, baaka ververe áte nane, baaka duksa mandzawe am nane dekideki.

²⁰ A eksesaa Dadaamiya ganakini watse á varakurvára an nane na wá, kwaye am fakta, amá náwa a sanse am sali kataliya á zamane na, ganakini á magakurá shagerire nanna.

²¹ Adaba ba nane una, fakurtarfe áte Dadaamiya na a tsante nane am faya, a vante yaikkire na. Estuwa, fakurtarfe áte Dadaamiya, fakurtefa tama á kure á ba áte nane palle.

²² Kina wá, an bára ervaunde á kure, adaba kwá ankwá fansarfe ge Dadaamiya am elva-aara na ba jirire na. Adaba una nanna, kwá ankwá waya egdzar mama-aha á kure an ervaunde á kure palle. Daaci wayawavewaye am dagave á kure ma vaatara keni áte una nanna.

²³ Adaba Dadaamiya yaikurseye ge buwire an elva-aara na á fá shifa am ura, á zleka dekideki na. Daaci kina wá, gakurevka wulfe-aha á edda una á emtsa na, amá kwa wulfe-aha á edda á shifa na á zleka dekideki na.

²⁴ Adaba a ba wakita á Dadaamiya:

«Bademme á emnde ta ba seke másá, á shekwaaka ula, zarire-aatare ba seke zarire á ugbene-aha, á shekwaaka valya á dem áhá.

²⁵ Amá elva á Yaakadada wá, á njá dem ba ge dekiðeki.»

Elva ñanna wá, ba labare á higa na kwa cenancena na.

2

Nákwá á shifa an emnde cuðeðe

¹ Ba seke una ni Dadaamiya a vakurte shifa anwaslire na wá, yawanya mazla-aara mága kemangerire antara fida, faskire, shelha ira zá vuwa á ura.

² Kure wá, gawevge ba seke egdzara áte erva, wedera-aatare ba uba geni tá wálá an ñane. Kure keni, tatayautataya ba elva á Dadaamiya á jirire, geni kwá wálá an ñane. Á de lyakursá ba ñane náza ba ge dekiðeki.

³ Ábi kina wá, tapakurnaatapa emtakire á Yaakadada?

⁴ Sawmbare á sezeñara. Adaba ñane nákwá na á vante shifa ge ura. Velyaranvevelye emnde, a ba itare: Nákwá na laake, amá a eksesaa Dadaamiya, jauje ge nákwá-aha umele bademme an daradza.

⁵ Daaci sawmbare á sezeñara, kure keni gawevge nákwá-aha á shifa, Dadaamiya á nyaña bere-aara an ñane, á njá Shedekwe-aara am huðe-aara. Zlaðe áðaliye am bere á Dadaamiya ñanna maa, kwá gev *liman-aha cuðeðe ge danaa sadake ge Dadaamiya áte una á kataná

ɲane. Á de hayanhaya sadake á kure adaba Yaisu *Almasiihu.

⁶ Adaba anƙwa an puwa am wakita á Dadaamiya, a ba ɲane:

«Anƙwa nákwá palle an daradza jipu ya eksesaa ya, watse yá nyaɲa bere-aaruwa an ɲane am *Siyauna, á de ɲáná ɲane ndzedá á bere ɲanna bademme. Ma a fetaara ware áte nákwá ɲanna keni, á hasleka deƙideƙi.»

⁷ Daaci ázekure na fakurtarfe áte ɲane na wá, nákwá ɲanna an daradza jipu. Amá emnde na fartarka áte ɲane na wá, estuweka. Adaba a ba wakita á Dadaamiya:

«Ba nákwá ɲanna ta eblyanvaa emnde a nyaɲa bere na una, a eksantehe ge Dadaamiya, a ganve nákwá na á ɲáná ɲane ndzedá á bere ɲanna bademme.»

⁸ A baa ba wakita á Dadaamiya ɲanna zlaɓe ádaliye:

«Nákwá ɲanna á de gev náza vatertaa ektápaare ge emnde umele, á de mbadatermbada.»

Tá mbadá, adaba tá fansarka ge Dadaamiya. A tsanaa ba estuwa Dadaamiya ge jeba á emnde ɲanna.

⁹ Daaci kure wá, kwa jeba na a dzerakursaa Dadaamiya, kwa *liman-aha á Slekse yaikke, kwa nalga cudedde na kwá átuge Dadaamiya. A daakursaa Dadaamiya am tabedammire, a sakuraa á sem parakkire-aara na hyemhye am slede bademme na. Dadaamiya a gakuve estuwa, geni kwá balaterá shagerire á slera-aha-aara ge emnde.

¹⁰ Werre wá, ndza kwa emnde a Dadaamiya ka, amá kina wá, gakurevge emnde a Dadaamiya. Werre wá, ndza zakurvarka Dadaamiya, amá kina wá, aṅkwa á zakurvarze.

Gawevge emnde a slera á Dadaamiya

¹¹ Egdzar mama-aha-aaruwa, am duniya na wá, kwa ba wayve-aha, kwá njá ba ge sarte cekwaṅgudí. Adfaba una ṅanna, taslawá á kure, magauka názena á kataná ire á kure mazla-aara, á keḏákurá ba una ṅanna.

¹² Zláláva á kure a gevge shagera am dagave á emnde na baaka nadina-aatare na. Daaci estuwa, ma ta fakuraa áte kwa emnde a mandzawe keni, ta de diyeddiye geni ndza baaka haypa á kure, daaci tá de gala Dadaamiya vacite na má watse daraada ákatafke-aara.

¹³ Kure emnde na dabakurteḏaba Yaakadada á miya Yaisu *Almasiihu wá, faufa zherwe áte emnde na tá an hákuma am duniya na baḏemme. Faufa zherwe áte male á larde á Rauma, adfaba ire ba ṅane arge male-aha umele baḏemme.

¹⁴ Faufa zherwe áte male-aha á larde na a bazlateraa ṅane baḏemme. A bazlater geni tá za emnde a mága shagerkire an bikere, tá gálá emnde a mága shagerire.

¹⁵ Kure wá, Dadaamiya á kátá kwá maga ba shagerire kina, geni a sharanka ṅudí-aha na baaka názu ta disaa itare na ndaha elva mandzawe áte kure ḏekideki.

¹⁶ Kina wá, kwá kwaraná ba kure ire á kure, njawinja ba estuwa. Amá am kwará ire á kure ṅanna wá, bawánka zlaḑe am ervaunḑe á kure

geni kwá dzegwándzegwa mága mandzawire keni. Gawevge emnde a slera á Dadaamiya.

¹⁷ Faufa zherwe áte emnde bademme, wayauwaya an egdzar mama-aha á kure emnde a fetarfe, kuvaukuva Dadaamiya, faufa zherwe áte male á larde á Rauma keni.

*Shaa zladá áte náza á *Almasiihu*

¹⁸ Náwa una wá, yá ndaakur ge kure kwa emnde a mága slera am mba á emnde: Fawatersarfe ge zanwe-aha á kure. Faufa zherwe áte itare ba shagera, ma áte zanwe-aha na ta mándzawe-aha keni.

¹⁹ Máki bashakuruḅashe zladá adaba Dadaamiya, gavka adaba haypa á kure wá, magakurnaamaga názena á kataná Dadaamiya.

²⁰ Amá má gakuruge haypa lauktu tá jakurá adaba ḅane wá, ma kwa bashu zladá keni, ḅaaka ura á galakurgálá d'ekideki. Máki kwa bashu já adaba shagerire, aley kwa naba eksarhe wá, á vante higa ge Dadaamiya.

²¹ Dadaamiya a daakur ba ge una ḅanna. Adaba *Almasiihu keni shaushe zladá adaba kure. An zladá-aara ḅanna wá, á marakurá ba garava á nja, geni kwá d'abaná á ba áte náza-aara.

²² ḅane wá, maganaaka haypa d'ekideki, ce-naránka elva a fida am mbuwe-aara.

²³ ḅane wá, ma zlazlarvaazlazle emnde keni, eptsaternaaka an zlazle d'ekideki. Ndza ta shanu zladá kwakya, amá a d'ú ba we-aara, a fetaare á ba an Dadaamiya ḅane Edda á shairiya jirire.

²⁴ Daaci a lyamivaare ba Almasiihu an ire-aara haypa-aha ge miya, a emtsa an ḅane áte

dzaŋgala. A magaa una ŋanna geni mí gevge ba seke má an emtsa áza haypa, amá má á ba an shifa á miya ge mága jirire. Adaba ververe-aha-aara, kure mbakuraambe.

²⁵ Werre wá, ndza kwa ba seke kyawe-aha na kedarkedá na, amá kina wá, sakuraasa, kwá am erva á Suni á piyakurá ŋane, baaka názu á geja shifa á kure dekideki.

3

Nwásha an zála-aha-aatare

¹ Kina wá, yá elvan ge kure ŋwásha: Faufa zherwe áte zála-aha á kure. Máki kwá aŋkwa magaterá una ŋanna wá, ukfe-aha a kure na zlaŋbe fartarka zála-aha-aatare na keni, zala-aha-aatare ŋanna tá de shá eŋkale. Kwá de baterná kure-ka elva á Dadaamiya, amá tá de fetarfe ba itare an ire-aatare, adaba shagerire á zlaláva á ŋwásha-aha-aatare.

² Watse tá nanna ba itare keni, geni baravbare zlaláva á kure, kwá aŋkwa fá zherwe jipu áte itare.

³ Zariyire á kure a gevka an mága ŋgelawire ba seke ndera úgje na zariya jipu na, antara kazlaŋa á mága ŋgelawire na tá maganá an dindar, ira sandaa zarizariya.

⁴ Amá magaumága ŋgelawire á kure á sawa am ervaunđe. Jeba á ŋgelawire ŋanna á zleka dekideki. Amaana shagerire á eŋkale antara ervaunđe. An daradza ba una ŋanna áza Dadaamiya.

⁵ Adaba ŋwásha werre na dabartedaba Dadaamiya, ta fete tama-aatare áte ŋane na wá,

itare ta magán ba estuwa ngelawire-aatare, ta faa zherwe jipu áte zála-aha-aatare.

⁶ Yehauteyeha Saraatu, mukse á Ibrahimia werre. Nane a magán ba estuwa ngelawire-aara, a faa zherwe jipu áte zhele-aara, a daana an dada. Kure keni, máki magakurka lyawa ge daba Dadaamiya, kwá ankwá maga ba shagerire wá, gakurevge egdzara á Saraatu nanna.

⁷ Kina wá, yá elvan ge kure zála: Kure keni nawanana nwanasha-aha á kure ba shagera, faufa zherwe. Diyaweddiye ganakini gergere ndzedá-aatare antara náza á kure. Adaba shifa na a vakurtaa Dadaamiya na wá, a vakurte ge kure antara itare bademme. Nawaterná á ba áte una nanna, lauktu á daada maduwa á kure ádeza Dadaamiya.

Sha zladá adaba jirire

⁸ Yá ankwá fakurarfe zlafe adaliye ge kure bademme, enkale á kure á gevge palle, magaumága zezarzire am dagave á kure, wayawapte-waye am dagave á kure ba shagera. Zlafe adaliye gawevge emnde a maggwe antara emnde a kemaare.

⁹ Má edda-aara a magakurte emtanakire wá, kure eptsawanaaka an emtanakire mazla-aara. Ma edda-aara a zlazlakurzlazle keni, epsawanaaka an zlazle. Arge una nanna wá, bawanánba ge edda-aara: Dadaamiya a vakteva shifa. Adaba Dadaamiya a daakur ba ge una nanna kure keni.

¹⁰ Ankwá an puwa am wakita á Dadaamiya, a ba nane:

«Edda una má á kata emtakire am shifa-aara, geni a gedetegeda wá, a nanaaṅa nara-aara ge valya elva yaiyaihe, antara fida.

11 Zlaḅe ádalíye a yanya mága kemaṅgerire, a emmaga shagerire an ervaunḁe-aara palle, a ettataya hairire an emnde ma vaatara keni.

12 Adaba Dadaamiya wá, á fateru hyema ba ge emnde a mága jirire. Baḁemme á názena tá yekaná itare, á vaterteva. Amá emnde a mága danḅwire wá, á eptsaterá ba iga.»

13 Daaci má kwá anḅkwa maga ba shagerire an ervaunḁe á kure palle wá, baaka ura á gaku-raptege ḁekidēki ge magakura kemaṅgerire.

14 Amá wá, ma kwá anḅkwa shá zlaḁa kina, adaba shagerire na kwá anḅkwa maganá kure keni, watse higa yaikke ge kure. Kuvauterka emnde ḁekidēki, a gazleka ervaunḁe á kure.

15 Kure wá, ḁemawanvedema kure ba *Almasiihu am ervaunḁe á kure, a gevge ba ṅane palle Yaakadada á kure. Ma vaatara keni njawinja á ba am niya á kure ge vaterte jawapa ge emnde na tá se ndava ázekure, áte tama na kwá faná kure áte Yaisu Almasiihu.

16 Má kwá anḅkwa vaterte jawapa ṅanna wá, vawaterteva an shagerire á ervaunḁe, kwá ámbera á fá zherwe áte itare. Ma vaatara keni magaumága slera á kure á ba an shagerire á ervaunḁe. Estuwa wá, ma ta zlazlakurzlazla emnde adaba shagerire á zlaláva á kure am elva á Yaisu Almasiihu keni, watse zherwe ba ge itare.

17 Máki una ṅanna namaari á Dadaamiya wá, shagera ba kwá shá zlaḁa adaba shagerire, arge

una tá shakuru zlada adaba haypa á kure.

¹⁸ *Almasiihu wá, nane a naba emtsehe adaba haypa á emnde. A emtsehe ba ser palle, zanaazle slera-aara bademme. Nane dzayye ervaunđe-aara, amá a emtsaa adaba emnde na baaka jirire-aatare. A magaa una nanna, geni á damiyá nane ádeza Dadaamiya. Jareja shifa-aara, amá Shedekwe Cudedđe a naba fem shifa am nane zlahe adaliye.

¹⁹ An hákuma á Shedekwe Cudedđe nanna maa, a de balateraa elva á Dadaamiya ge shedekwe-aha na tá am dangay na.

²⁰ Shedekwe-aha nanna wá, ba shedekwe-aha á emnde na ndza degdege ire-aatare ge cena elva á Dadaamiya am zamane á *Nuhu na. Dadaamiya a fater ervaunđe kwakya, amá Nuhu a zlau ba estuwa am slera á mága paare, cenarka. Ba emnde tiise una ta deme am paare nanna, Dadaamiya a nezlaterse itare an yawe nanna.

²¹ Yawe na ta nezlesaa itare an nane na wá, gevge ba seke baptisma na tá magakurán ge kure kina, Dadaamiya á nezlakurá an nane na. Yawe á baptisma nanna wá, gergere antara yawe ba dey na emnde tá bárá an nane. Adaba mí nala áza Dadaamiya, geni á baramiyá ervaunđe. Yaisu Almasiihu wá, nane tsetse am faya. Adaba una nanna á nezlakurnezla baptisma.

²² Kina wá, nane eptsapta á dem samaya, anƙwa am nadafa á Dadaamiya. Á kwaraterá nane malika-aha á Dadaamiya antara shedekwe-aha umele na tá an hákuma am samaya na bademme.

4

Njawinja an shifa na anwaslire

¹ Ba seke una ni *Almasiihu se shaushe zlaɗa am duniya na wá, kure keni wavauwava ganakini enkaɓe á kure a gevge palle antara ɗane, ma ge shá zlaɗa-ara keni. Adaba má edda-aara a naba eksar shá zlaɗa wá, a yaa ba mága haypa.

² Daaci kina wá, tsante am vatena dem halavuwa á shifa á kure am duniya na wá, magauka názena á kataná ire á kure mazla-aara, magaumága namaari á Dadaamiya.

³ Njá á kure werre na ndza kwá maga ba názena wayaaka Dadaamiya na wá, hyaahya mazla-aara. Adaba slera á kure ndza ba mága zawarire, dakarire, ndza kwa emnde a mbazla jipu, ndza kwa emnde a waya dem tate á gusa mandzawe, ndza kwa emnde a kezlan ugje ge hele arge daba shairiya-aha á Dadaamiya.

⁴ Amá kina wá, kwa emnde ɗanna-ka mazla-aara. Tá maga ba najipu-aara emnde na zlaɓe tá á ba am kazlaɗa ɗanna, tá zlazlakurzlazle adaba kwá dábaterka mazla-aara á dem tate á mága haypa ɗanna.

⁵ Amá ákatafke á sleshairiya wá, watse tá diyeddiye slera-aha-aatare ɗanna baɗemme. Edda una watse á kyaná ɗane shairiya á emnde a faya an emnde na tá an shifa, á ufa ba itare.

⁶ Náza á emnde a faya wá, ndza naranna palasa am duniya ba seke una ni emnde baɗemme tá njá ba ge ɗane na. Amá Yaisu Almasiihu a de magateraa waazu am faya ɗanna,

geni itare keni a sharansha shifa na an nane Dadaamiya.

Magaumága názena a fakuraara Dadaamiya

⁷ Kina wá, herzhapteherzhe halavuwa á duksa bademme. Adaba una nanna faufa hyema, pauka hare d'ekid'eki ge mága maduwa.

⁸ Duksa yaikke wá, magaumaga wayavire am dagave á kure an ervaunđe á kure palle, adaba ba wayavire una á ganse haypa kwakya am dagave á emnde.

⁹ Ma ware á kure keni, a lyevaalya ura-aara á ba an higa am huđe á há-aara.

¹⁰ Ma ware á kure keni, a effa hyema áte hákuma á mága duksa na a faraa Dadaamiya ge nane. Magawateránmaga shagerire ge emnde an hákuma nanna.

¹¹ Edda una a shaa hákuma á mága waazu, a ndaha ba elva á Dadaamiya. Edda una a shaa hákuma á melateru ge emnde am slera, a emmága an ndzedá na a vantaa Dadaamiya. Daaci am názena kwá maganá kure bademme wá, emnde a galargálá Dadaamiya adaba Yaisu *Almasiihu. Yaikkire an hákuma ba náza-aara dem ba ge d'ekid'eki. *Aamin.

Sha zladá adaba zhera á Yaisu

¹² Daaci ma an'kwa zladá áte kure kina keni, a wesheka ire á kure emnde-aaruwa, zharauka seke duksa na ni a shaa ba kure palle; Dadaamiya á kurá ba fetarfire á kure an nane.

¹³ Baira fawarfe ge higa á kure, adaba gakurevge palle antara *Almasiihu am zladá-aha na a shanaa nane. Vacite na má de samsa nane

am yaikkire-aara, watse higa yaikke ge kure zlaɓe ádaliye.

¹⁴ Má tá aŋkwa zlazlakurzlazle emnde aɗaba kwa emnde á Almasiihu wá, higa yaikke ge kure, aɗaba Sheɗekwe Cuɗeɗɗe á Dadaamiya á se njá am kure an yaikkire-aara.

¹⁵ Amá a jerka zlaɓe ura am dagave á kure á shá zlaɗa aɗaba mandzawire-aara, bi a jaa shifa, bi a ilu duksa á ura, bi a deme am elva á emnde.

¹⁶ Má edda-aara á shá zlaɗa aɗaba Almasiihu wá, a wanka zherwe ɗekiɗeki, a slafannaaslafa we-aara ge Dadaamiya aɗaba fetarfire na a shanaa ɲane, párákke áza emnde baɗemme na.

¹⁷ Kina wá, herzhe shairiya á emnde baɗemme. Diyaweddiye geni Dadaamiya á de fantau á ba áte emnde-aara zuɲɲwe. Má Dadaamiya zatervarka ge emnde-aara, watse á tse áme kena náza á emnde na fartarka áte labare á higa na a belanaa ɲane?

¹⁸ Aŋkwa an puwa am wakita á Dadaamiya, a ba ɲane:

«Má ta ɲezla zlahhe emnde a jirire mu, watse estara náza á emnde a mága mandzawire na ɗabarka Dadaamiya na?»

¹⁹ Daaci estuwa, emnde na tá aŋkwa shá zlaɗa aɗaba namaari á Dadaamiya na wá, a faranemfa itare shifa-aatare am erva ba ge Slenderaterndera, ɲane á eptseka elva-aara ɗekiɗeki. A magarmága shagerire, a yaranka ɗekiɗeki.

5

Fawaterufe hyema ge emnde á Dadaamiya

¹ Kina wá, yá elvan ge male-aha á kure kwa emnde á Dadaamiya. Iya keni, ya slesawari á emnde a fetarfe ba seke itare, ya seyde á Yaisu *Almasiihu am zladá-aha-aara bademme; iya keni watse yá á ba an slede-aaruwa am yaikkire-aara má de samsa nane. Náwa názu yá yekaná ázekure:

² Fawaterufe hyema ba shagera ge emnde á Dadaamiya na tá am erva á kure, ba seke suni á fateru hyema ge kyawe-aha-aara. Magauka slera nanna áte laarire, amá magaumága adaba a wayetaa ba ervaunde á kure. Magauka adaba waya á nalmane, amá adaba a eksesaa ba ervaunde á kure slera nanna áte namaari á Dadaamiya.

³ Magauka yaikkire arge itare, amá marawateránmara zlaláva shagera, ganakini a dbarakurdaba itare keni.

⁴ Máki magakurnaamága slera á kure áte una nanna wá, watse kwá shá *dɔŋkaula na á zleka darádza-aara dɛkideki na, má watse samsa Male á suni-aha bademme.

⁵ Kina wá, yá elvan ge kure dawalaa: Faufa zherwe áte male-aha á kure. Amá bademme á kure ákatarfke á Dadaamiya, ma ware keni a ganaaga ire-aara á katarfke á emnde. Adaba a ba wakita á Dadaamiya:

«Dadaamiya a lyiyeka emnde na tá gálá ire, amá á magaterá ngurna ge emnde na tá ankwá ga ire-aatare á dem áhá.»

⁶ Adaba una nanna, gawanaaga ire á kure á katarfke á Dadaamiya na Slekse ba nane palle na, á de kakuránteka nane má daada áte náza-aara.

⁷ Dzamauka ðekidëki ma uwe keni, fawanemfa am erva ba ge ñane, adaba ñane Slefakuru hyema.

⁸ Faufa hyema áte ire á kure, tsakautsaka hyema, adaba kelaade á kure Shaitaine tsan-tetse hala-aara, ankwá tsagwada ba ura ge kedanaakeda, ba seke mága á ervare na á waná waya á tsegwada názu á ezza.

⁹ Ma vaatara keni vawánteka baráma ðekidëki, fautarfe á ba áte Dadaamiya. Diyakurdiya emnde umele keni kwakya am duniya na tá ankwá shá zlada ba seke kure.

¹⁰ Má shakurushe zlada am sarte cekwaanjudi na wá, Dadaamiya na bademme á ngurna á magaterná ba ñane ge emnde na, á de magakuránmaga ngurna. Amaana á de gakurvege emnde na hyairephye am duksa bademme, á de ndzedakurtendzedá am duksa bademme, kwá de tsaatse, baaka názu á de dzegwándzegwa mbedakuraambeda ðekidëki. Adaba a ðaakuraa Dadaamiya ganakini kwá de njá antara *Almasiihu am yaikkire-aara náza dem ba ge ðekidëki.

¹¹ Hákuma ba náza á Dadaamiya dem ba ge ðekidëki. *Aamin.

Ga use am halavuwa á elva-aha

¹² Kwaye ñane egdza wakita ñanna a meliwa Silwanus ge puwakurte ge kure. Ñane egdza emmemiya na yá ezzhara dzayye ervaundë-aara. An wakita ñanna wá, yá kátá fakurem ndzedá am vuwa, yá kátá kwá diyeddiye ngurna jirire na a magakurnaa Dadaamiya. Daaci tsawaatse á ba áte ngurna ñanna.

¹³ Emnde a fetarfe na a dzeratersaa Dadaamiya ba seke kure, tá am larde á *Babila áhuna, tá ańkwa gaktur use-aatare. Egdza-aaruwa Markus keni ańkwa gaktur use-aara.

¹⁴ Gauga use á ńere am dagave á kure bademme an ervaunđe á egdza mamire.

Dadaamiya a vakurteva hairire ge kure emnde á *Almasiihu bademme.

Wandala
The Holy Bible in the Wandala language of
Cameroon
La Bible en wandala

copyright © 1999 Wycliffe Bible Translators, Inc.

Language: Wandala

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 13 May 2025 from source
files dated 13 May 2025

dec75dd5-4784-5059-aa00-668d508a6b0d